

solo hominē habeāt, quod desiderāt, quod numeratō obxerāt pretiō. Etenim Homo μικρόκοσμος ille, exiguō suō, sed affabrē exasciatō corpusculō amplissimum nobis, idque stupendis rerum imaginibus pulcerrimē illustratum exhibet amphiteatrum, in quo suō spectare modō licet, quibuscunque aliās universi hujus œconomia superbit, suosque spectatores in sui rapit admirationem. Quid, quod Homo Animā suā immortalī, quasi Numen aliquod nobis repræsentet, quod corpus, non secus, ac supremum illud Numen Deus Ter Opt. Max. hoc universum, conservat & gubernat? Singulas animæ humanæ facultates, partes corporis organici singulas sigillatim enumerare, enumeratas dignis encomiis deprædicare nostri non est instituti, Veritas ipsa loquitur, illum, qui philosophiæ exordia ponit in contemplatione hominis, incipere non malè philosophari. Et hæc ipsa nisi fuisset alia, sufficiens esse posset ratio, cur & mea exigua tenuitas, posteaquam primum in studio philosophico facere periculum ausa est, ab homine exordiat. Cum autem Hominem à capite ad calcem, quā corpus, quā animam exponere, nimis unā vice foret prolixum, de quadam saltim Hominis facultate, de VOLUNTATE sci. paucas pariter & rudis ingenioli sui modulō bene mensas paginas publico, sed benevolo Eruditorum examini in præsentia exhibet. Tuum erit, Lector Candide, conatui huic favere.

*Ut desint vires, non est culpanda Voluntas.*

Tuum erit, si non nihil, quod boni Auctores, nostrique Præceptores suppeditarunt, thesibus sequentibus accommodatum invenerit, æquanimiter id interpretari, & cogitare Comicum hoc jam olim suo:

*Nullum est iam dictum, quod non dictum sit prius, excusasse.*

S. I. VO.